

續資治通鑑卷第五十九

遷上策第都臺書兼饒右都御史總督湖北湖寧處地方事務兼理糧餉等事都尉畢沅集

宋紀五十九

起上章困敦六月盡重光赤奮若八月凡一年有奇

仁宗體天法道極功全德神文聖武睿哲明孝皇

帝

嘉祐五年

遼清寧六年

六月戊午朔遼以東北路女直詳袞

舊作詳穩今改

杲嘉努

舊作高家奴今改

為特里袞

舊作惕穩今改

壬戌遼

遣使錄囚

乙丑詔戒上封告訐人罪或言赦前事及

言官事彈劾小過不關政體者時殿中侍御史呂誨言

故事臺諫官許風聞言事者蓋欲廣其采納以補朝廷

闕失比來中外臣僚多告訐人罪既非職分實亦侵官
甚者詆斥平素之缺暴揚陵昧之事刻薄之態浸以成
風請懲革之故下是詔 丙寅命天章閣待制張揆同

詳定均稅 遼中京置國子監命以時祭先聖先師

壬申詔禮部貢院內外鎖廳并親戚舉人竝同引試解

十分之一如不及十人亦許解一名四人以下送鄰路

聚試 乙亥遣官分行天下訪寬卹民力事發異張耒明道雜誌

曰韓魏公當國遣使出諸道以寬卹民力爲名既行魏公大悔之每見外來賓客必問寬卹使者不擾郡縣否意恐詔使擾民重不安也無幾皆罷之木傳不載此事今不取 癸未遼以隋王耶律

仁先復爲北院大王先是仁先嘗爲北院大王有惠政

及是民歡迎數百里如見父母 甲申三司減省冗費
所言比歲內人請俸倍多乞酌天聖初嬪御以下人數
著爲定額從之 秋七月辛卯詔分京西爲二路以許
陳鄭滑孟蔡汝潁信陽九州軍隸北路鄧襄隨房金唐
均郢光化九州軍隸南路各置安撫使以許鄧二州守
臣兼之其河南府卽不隸所部 癸巳邕州言交趾與
甲峒蠻合兵寇邊都巡檢宋士堯拒戰死之詔發諸州
兵討捕 甲午以天章閣待制知諫院唐介知荆南從
介請也敕過門下知封駁事何郯封還之言介爲諫官
有補朝廷不當出外詔介復知諫院如故 戊戌翰林

學士歐陽修等上所修唐書二百五十卷刊修及編修官皆進秩或加職仍賜器幣有差 著作佐郎劉義安爲崇文院檢討未入謝疽發背卒義安彊記多識尤長於星歷數術其言多驗 時生齒益蕃田野加闢獨京

西唐鄧州尚多曠土唐州閒田尤多或請徙戶實之或請以卒屯田或請廢州爲縣知州事比部員外郎趙尚寬言土曠可益墾闢民稀可益招徠而州不可廢乃案圖記得召信臣故迹益發卒復大三陂一大渠皆溉田萬餘頃又教民自爲支渠數十轉相浸灌而四方之民來者雲集尚寬復請以荒田計口授之及貸民官錢買

平比三年廢田盡爲膏腴增戶萬餘監司上其狀三司使包拯亦以爲言丙午詔畱再任

發墨仁宗實錄及本傳治平元年正月尚

寬再任今從長編

庚戌詔曰朕樂與士大夫惇德明義以先

天下而在位殊趨弗率朕旨或爲危言詭行務以警眾取譽罔上而邀寵論事之官按挾隱微無忠恕長厚之風託迹於公而原其本心實以合黨圖私甚可惡也中書門下其采端實之士明進諸朝察辨矯激巧僞者加放黜焉御史中丞趙槩言比年以來搢紳之論多險刻競浮空行戒敕之故降是詔王子命翰林學士吳奎戶部副使吳中復度支判官王安石右正言王陶同相

度牧馬利害以間時馬政因循不舉言者以爲當有更
革也 八月丁巳朔以觀文殿學士吏部侍郎程戡爲
宣徽南院使判延州殿中侍御史呂誨言戡才微識闇
外厚中險交結權貴因緣進擢徇私罔上忙勢作威況
年逾七十自當還政近罷樞府旣以匪能復委帥權曷
由勝任且本朝故事宣徽使非武勳未嘗除拜乞追寢
戡恩命知雜御史范思道等相繼論列訖不從 以度
支判官金部員外郎薛向權陝西轉運使兼制置解鹽
使范祥旣卒故以向代之時西夏青鹽盜販甚賤而官
賣解鹽價高鹽以故不售向至始減價以抑之鹽池歲

調畦夫數千種鹽而鹽支十年未售向奏損其數當時
優之 甲子以睢州進士蘇洵爲試校書郎洵年二十
七始發憤爲學舉進士茂才異等不中悉焚其常所爲
文閉戶益讀書遂通六經百家之說下筆頃刻數千言
至和嘉祐閒與其二子軾轍至京師翰林學士歐陽修
上其所著權書衡論機策二十二篇宰相韓琦善之召
試舍人院以疾辭本路轉運使趙抃等薦其行義修又
言洵旣不冝就試乞除一官故有是命 壬申詔曰國
初承五代之後簡編散落三館聚書纔萬卷其後平定
列國亦嘗分遣使者屢下詔令訪募異本校定篇目聽

政之暇無廢覽觀然比開元遺逸尙眾宜加購賞以廣
獻書中外士庶竝許上館閣闕書每卷支絹一匹五百
卷與文資官 相度牧馬利害所吳奎等上言今陝西

馬價多出解鹽三司所支銀絹許於陝西轉運使易錢
權轉運副使薛向旣掌解鹽陝西財賦可悉委之移用
仍俾擇空地置監而孳養之蓋得西方不失其土性一
利也因未嘗耕墾之地無傷於民二利也因向之才使
久其任而經制之三利也帝可其奏甲申命向專領本
路監牧及買馬事仍規度於原渭州德順軍置場同州
沙苑監鳳翔府牧地使臣竝委向保薦以聞歐陽修言

唐之牧地西起隴右金城平涼天水外暨河曲之野內則岐關涇寧東接銀夏又東至於樓煩以今攷之或陷沒蕃戎或已爲民田皆不可復得惟河東嵐石之閒荒山甚多及汾河之側艸地亦廣其閒艸軟水甘最宜養牧此乃唐樓煩監地也迹而求之則樓煩元池天池三監之地尙冀可得臣往年奉使嘗行威勝以東及遼州平定軍見其不耕之地甚多而河東一路山川溪峻水艸甚佳地勢高寒必宜馬性又京西路唐汝之閒荒地亦廣請下河東京西轉運使遣官審度若可興置監牧則河北諸監尋可廢罷下其奏相度牧馬所奎等請如

修奏乃詔選官分詣河北河南諸監案牧地肥瘠頃畝
俟得實數卽遣官二人案視其陝西估馬司仍委向規
度以聞向乃上言秦州券馬至京師計所值并道路之
費一馬當錢數萬然所入止中雜支於上等良馬固不
可得請於原渭州德順軍置場收市以解鹽支引募蕃
商廣售良馬八千三千給緣邊軍騎五千入羣牧司詔
從之 乙酉罷諸同提點刑獄使臣置江南東西荆湖
南北廣南東西福建成都梓利夔路轉運判官先是同
提點刑獄使臣或有竊公用銀器及樂倡首飾者議者
因言使臣多不習法令民事不可爲監司故罷之十一

路舊止一轉運使至是各增置判官以三年爲一任

九月丁亥朔起居舍人知制誥劉敞爲翰林侍讀學士
知永興軍初臺諫劾敞行呂溱責官制詞不直又前議
郭后祔廟嘗云上之廢后慮在宗廟社稷不得不然是
欲導人主廢后也章十數上敞不自安會永興闕守遂
請行詔從之 己丑太白晝見 丙申命樞密直學士
右諫議大夫呂公弼同詳定均稅 辛丑詔齊登密華
邠耀鄜絳潤婺海宿饒歙吉建汀潮十八州並煩劇之
地自今令中書選人爲知州其知潮州委本路轉運提
點刑獄司同保薦之 翰林侍講學士給事中楊安國

卒贈禮部侍郎安國講說一以注疏爲主在經筵二十
七年帝稱其行義淳質以比先朝崔遵度 駙馬都尉
安州觀察使李瑋與公主不協而瑋所生母又忤主意
主夜開皇城門入訴禁中瑋惶恐自劾庚戌降瑋爲和
州防禦使仍與外任明日免降官止罰銅三千斤畱京
師 癸丑右正言王陶言漢光武出獵夜還上東門候
鄧恽拒關不納光武從中東門入明日賞鄧恽而貶中
東門候魏武之子臨淄侯植開司馬門晝出魏武怒公
車令坐死今公主夜歸未辨眞僞輒便通奏開門納之
直徹禁中略無機防其所歷皇城宮殿內外監門使臣

請竝送劾聞封府知諫院唐介殿中侍御史呂誨等亦
以爲言皆不報 冬十月丙辰朔詔自今因奏舉改官
及升差遣其所舉人各犯枉法自盜而會赦不原者舉
主亦毋得以赦論 庚申兗國公主宅都監梁全一等
竝置遠小處監當梁懷吉配西京洒掃班自今勿置都
監別選內臣四人在宅勾當入位祇候竝不得與駙馬
都尉接坐時臺諫官皆言主第內臣數多且有不自謹
者帝不欲深究其罪但貶逐之因省員戛制 甲子遼
主駐薄絲淀 十一月丁亥以均州防禦使李珣爲相
州觀察使單州團練使劉永平爲齊州防禦使知制誥

楊畋封還珣永平詞頭因言祖宗故事郭進戍西山董
遵誨姚內斌守環慶與彊寇對壘各十餘年未嘗轉官
移鎮重名器也今珣等無尺寸功特以外戚故除之恐
非祖宗法不報詔它舍人草制而范鎮言朝廷如以楊
畋之言爲是當罷珣等所遷官儻以爲非乞復令畋命
詞不許旣而鎮復有論列遂罷之 戊子錄故陝西置
解鹽使度支員外郎范祥孫景爲郊社齋郎子太廟室
長褭候服闋與堂除差遣權三司使包拯言詳建議通
陝西鹽法行之十年歲減權貨務緡錢四百萬其勞可
錄故有是命 辛丑樞密使兵部尙書同平章事宋庠

罷爲河陽三城節度使同平章事判鄭州殷中侍御史
呂誨等論庠外寬內忌近者李瑋家事猥陳均州繆例
欲陷瑋淡罪阿公主意賴上明察不行其言且結交內
臣王保寧陰求援助昨除御藥院供奉四人遙領團練
使刺史保寧乃其一也三班院吏授官隔過年限略不
懲誠御前忠佐年當揀選乃復姑息其徇私罔公率如
此章凡四上右司諫趙抃亦論庠不才詔從優禮罷之
以禮部侍郎參知政事曾公亮依前官充樞密使樞密
副使右諫議大夫張昇禮部侍郎孫抃並參知政事翰
林學士禮部侍郎知制誥史館修撰歐陽修樞密直學

士右諫議大夫陳旭御史中丞趙槩竝爲樞密副使仍以槩爲禮部侍郎 詔自今臣僚之家毋得陳乞御篆神道碑額 辛亥以直祕閣判度支句院司馬光度支判官直集賢院王安石同修起居注光五辭而後受安石終辭之最後有旨令閤門吏齎敕就三司授之安石避於廁吏置敕於案而去安石遣人追還之上章至八九乃受 十二月癸酉太常禮院言自今文武臣僚薨卒法當謚者考功於未葬前取索行狀移禮官攷定如其家葬速集議不及則許賜之其有勲德旣葬未嘗請謚者亦聽取旨詔可 戊寅以樞密直學士呂公弼爲